

# SADNJA I NJEGA SEZONSKOG CVIJEĆA

*U praksi se ne može povući oštra linija između jednogodišnjeg i dvogodišnjeg cvijeća, otporne jednogodišnje vrste se mogu ponašati kao dvogodišnje, posijane u jesen sljedeće sezone neobično bogato i rano cvjetaju. Kasnija sjetva na otvorenom u maju mjesecu osigurava raskošnu cvatnju tokom ljeta. Neke jednogodišnje vrste često se mogu ponašati i kao trajnice, ostaju na gredici i nekoliko godina kao što je sljez (Althea rosea) i maćuhice (Viola tricolor).*



Sezonsko cvijeće se razmnožava sjemenom. Dijeli se na poluotporne i otporne vrste. Proizvodnja sadnog materijala za poluotporne vrste odvija se u zaštićenom prostoru. Sjetva se vrši u rano proljeće (januar - februar), dok se otporne vrste mogu sijati i na stalnom mjestu na otvorenom kada prođe opasnost od kasnog proljetnog mraza, što zavisi od klimatskih karakteristika podneblja. Jednogodišnje cvijeće cvjeta i propada u jednoj vegetacijskoj godini, dok dvogodišnje vrste stvaraju lišće i izdanke u prvoj vegetacijskoj godini, a cvjetaju u narednoj. Kao nedostatak kod jednogodišnjeg cvijeća ističe se jednovremenost cvjetanja vrsta u periodu od juna do oktobra, nakon toga perioda cvjeta mali broj vrsta sezonskog cvijeća.

Pri proizvodnji sadnog materijala dvogodišnjeg cvijeća nakon sjetve u zaštićenom prostoru neophodno je pikiranje, vrši se kada su biljčice dobile dva do tri listića. U jesen, kad su biljke već lijepo razvijene, presađuju se na stalno mjesto. Pikiranje i presađivanje pospješuje bujnost rasta. Neke se dvogodišnje kultivirane vrste razmnožavaju godinama same ako ne diramo zemlju na mjestu gdje su procvale, ocvale i prosule sjemenke.

Redovne agrotehničke mjere obuhvataju:

- proizvodnja sadnog materijala: sjetvu sjemena u zaštićenom prostoru i na otvorenom polju, pikiranje mladih biljčica ili prorjeđivanje kod sjetve na stalnom mjestu
- njega tokom vegetacije: zalijevanje, prihranjivanje, uklanjanje ocvalih cvjetova i oštećenih grana itd.



Uspješan uzgoj jednogodišnjeg i dvogodišnjeg cvijeća obuhvata pravilan izbor mjesta sadnje. Veliki broj vrsta traži osunčane položaje, dok izbor vrsta pogodnih za sjeverne i sjenovite položaje nije veliki. Ovo cvijeće ostaje na zemljištu jednu sezonu te podnosi manje bogato tlo.

Popis slika:

1. Begonia semperflorens – begonija, dževahir
2. Viola tricolor – maćuhica (carevo oko, noć i dan)
3. Tagetes patula – kadifica
4. Begonia semperflorens – begonija, dževahir